

PAGPAPARAROM SA TATARAMON

Rev. Fr. Luisito A. Occiano

Kan si Jesus nakapako sa Cruz, igwang nakasurat sa taas kan krus na "INRI", boot sabihon sa Latin, "*Jesus Nazareus Rex Iudaeorum*"; o sa Ingles, "*Jesus of Nazareth King of the Jews*." Ngonian, bako lang siyang Hade kan mga Judeo kundi hade kan langit asin daga.

Ngonian na Domingo satong pinagecelebrar an Solemnidad kan *Cristo Rey* or Cristong Hade. Sa evangelio niato ngonian ipinapahiling an pagbalik liwat ni Jesus an Hade na mahukom sato gabos. Ano an manunudan niato sa satong celebracion ngonian na Domingo?

Enot, mayo pong nagigin hade sa paagi nin eleksyon o pirilian. Nagigin hade an sarong tawo nin huli ta siya nagsalihid (*succession*) o kaya nasakop niya an sarong lugar matapos an guera.

Si Cristo bilang hade dai nanggana sa eleksyon; mala ngani kun igwang eleksyon, madadaog siguro siya nin huli ta kadakul habo saiya. Alagad siya an hade niato nin huli ta siya an Aki kan Dios na kagsakop asin kag-rugaring kan gabos. Dai sana siya naggana sa ordinariong ralaban kundi dinaog niya an kasalan sa paagi kan saiyang pagkagadan asin pagkabuhay liwat huli kan pagkamoot sa satuya.

Panduwa, an celebracion niato ngonian nagpapagiromdom sato kan saiyang pamamayo satuya. Anong klase an saiyang pamamayo? Pamamayo nin Pagkamoot. Igwang mga hade na pinapaurog an poder asin kapangyarihan. Kun kaya pinapapusog an saiyang mga soldados nin huli ta kamawotan niya na manggana sa gabos na gyera asin magadan an saiyang kaiwal. Alagad an pinapaurog si Cristo bilang Hade bakong pagkaungis o kapangyarihan kundi pagkamoot. Siya an hade na mayong ibang gustong sakupon kundi an puso nin gabos tanganing mamoot sa mga dukha, pakakanon an mga nagugutom, painomon an mga napapaha, bisitahon an mga nabibilango asin may helang. Ini an klase nin pamamayo kan Cristong Hade. Ngonian na yaon kita sa panahon nin kalamidad, ano daw may ginibo na lamang kitang tabang sa mga nangangaipo? Sabi ngani kaiyan, gabos kita igwang maikakatao sa satong kapwa, asin gabos man kita igwang pangangaipo sa iba.

Pangtolo, kun siya hade na nagsakop kan gabos kaipuhan magpasakop kita sa hade. Sabi ni Fr. Jerry Orbos, SVD, kaipuhan ta mag-"*Resign*" sa satong pagkamasadiri. Kun hahaleon niato an "*S*" sa *resign* – an matatada "*Reign*" Kun haleon ta an "*S*" – *selfishness* sa buhay ta tunay na ma raynar an Hade – si Cristo sa satong sadiri. Kun siring, kaipuhan palan na lingawan ta muna an satong sadiri asin tugutan niato na an saiyang katokdoan iyo an mangyari sa aro-aldaw niatong pagkabuhay.

Sa madaling sabi, maski ngani mayong hade an nagigin hade huli sa eleksyon, an satong relasyon sa satong Hade mas magigin magayon asin pusog kun pipilion ta man giraray an saiyang pag-giya sato sa paagi kan saiyang mga katukdoan. An tunay na kahulugan kan celebracion niato iyo na liwat sakupon ni Jesus an puso niato tanganing an gabos makabalik sa saiyang kahadean sa langit. Duman gabos mag-eerok an gabos na naging maimbod sa pag-samba asin pagsabuhay kan katukdoan kan Hade nin mga Hade.

GIYA SA PAGHOROP-HOROP

1. Pano mo mapatunayan na si Cristo an nghahade sa Buhay mo?
2. Anong mga gibong herak an pwede mong magibo ngonian na panahon nin kalamidad?
3. Pano mo maipamidbid si Cristo sa iba?

RITO SA PAGPOÓN

Pataratara

C — "An Pagtogdas kan Kahadean nin Dios."

Ipinagsecelebrar niato an Solemnidad kan satong Kagurangnan Jesu Cristo, Hade kan gabos na linalang. Sa liturgia inaapodan kita gabos na maghorop-horop manonogod kan Kahadean nin Dios. An saiyang Kahadean iyo an tunay na pagkamoot asin katoninongan. Ipamibi niato sa celebracion kan liturgia na si Cristo magdanay bilang Hade kan satuyang buhay. Siya man naggad an tunay na Hade na dinaog an poder nin kadikloman na dara kan pagkakasalà.

Antifona sa Paglaog (Ap 5, 12; 1, 6)

(*Sinasambit kun mayo nin Awit sa Paglaog*)

Maningo an Cordero na ginadan, na mag-ako nin kapangyarihan asin pagka-Dios, donong asin kusog asin paggalang. Saiya man sana an kamurawayan asin kapangyarihan sa kapanahon kan mga panahon.

Pagpangurus

asin Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasalan, tanganing magkanigo kitang magcelebrar kan mga banal na misterio. (*Halipot na pagtoninong*)

Gabos — Nagkukumpisal ako sa Dios na makakamhan, asin saindo, mga tugang, ta nagkasalà ako nin makuri sa isip, sa tataramon, sa gibo, asin sa kapabaya-an: salà ko, salà ko, makuring salà ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod satò an Dios na makakamhan asin, pakapatawada an satong mga kasalan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa daga katoninongan sa mga tawong marahay an boot. Inoomaw mi ika, rinorokyaw mi ika, sinasamba mi ika, pinapamuraway mi

ika, pinapasalamat mi ika huli kandakula mong kamurawayan, Kagurangnan na Dios, Hadeng langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpapara kan mga kasalan kan kinaban, kaheraki kami; ika na nagpapara kan mga kasalan kan kinaban, akua an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita. (*Halipot na pagtoninong*)

Dios na makakamhan asin daing kasagoran, na nagboot na magbago kan gabos na bagay sa namomotan mong Aki, Hade kan gabos na linalang, kaheraking warasan na an bilog na linalang, na talingkas sa kaoripnan, maglingkod sa saimong kadakulaan, asin mag-omaw saimo na daing katapusan. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA NIN TATARAMON

Enot na Babasahon

(Ezekiel 34, 11-12. 15-17) (*Tukaw*)

An Enot na Babasahon nagpapahayag kan katongdan kan sarong pastor na yaon an dakulang pag-ataman sa saiyang mga karnero.

Pagbasa sa Libro ni Profeta Ezekiel

Ini an itinaram nin Dios na Kagurangnan: “Uya, ako an mahanap kan sakong mga karnero, asin aatamanon ko sinda. Hinahanap kan pastor an mga karnero kun nawawara, siring man, hahanapon ko an sakong mga karnero. Aagawon ko sinda sa gabos na lugar na pinagkawararaan sa sinda, kan aldaw na mapanganoron asin madiklom. Ako an magigin pastor kan sakong mga karnero, asin ako magpapahigda sinda.” Olay nin Dios na Kagurangnan: “Hahanapon ko an nawawara, asin ibabalik ko an nalalagalag, bubugkason ko an nabarian, papakusogon ko an maluya asin babantayan ko an mataba asin makusog, papakakanon ko sinda siring sa maninigo. Dapit sa sindo, sakong kakarnerohan, ini an itinaram nin Dios na Kagurangnan: “Uya, huhukoman ko an karnero asin an karnero, an mga karnero asin an kanding.”

Tataramon kan Kagurangnan.

Gabos — **Salamat sa Dios.**

Salmo Responsorio

(Salmo 23, 1-2. 2-3. 5-6)

S — An Kagurangnan sakong Pastor: daing anoman na magkukulang sako.

1. An Kagurangnan iyo an sakong pastor, daing anoman na magkukulang sako, pinapahiling niya ako sa mga verdeng sabsabon. (**S**)
2. Dinadara niya ako sa mga tubig na malinaw. Giraray pinapakusog niya an

sakong kalag. Pinapangenotan niya ako sa mga dalan nin katanosan huli sa saiyang ngaran. (**S**)

3. Nag-aandam ka nin sarong bangkete para sa sako sa atubang nin sakong mga kaiwal; an sakong payo linahidan mo nin lana, an sakong caliz nagsusupay. (**S**)
4. Totoong an karahayan asin an pagkaherak nagdadara sako sa gabos na aldaw nin sakong buhay, mag-eerok ako sa harong nin Kagurangnan sagkod na ako may buhay. (**S**)

Ikaduwang Babasahon

(1 Corinto 15, 20-26. 28)

Dinaog ni Cristo an kagadanan. An saiyang kapangyarihan bilang Hade ginamit niya tanganing daogon an poder nin kadikloman na dara kan pagkakasala.

Pagbasa sa Enot na Surat ni San Pablo sa mga taga-Corinto

Alagad an totoo si Cristo binuhay-liwat sa mga gadan bilang patotoo na bubuhayon-liwat an mga gadan. Huli ta siring na an kagadanan nag-abot huli sa sarong tawo, siring man, an pagkabuhay-liwat nag-abot huli sa sarô man na tawo. Ki Adan an gabos na tawo nagadan, siring man, ki Cristo, an gabos mabubuhay-liwat. Bubuhayon an lambang sarô sa sadiring panahon na talaan saiya. Si Cristo an enot sa gabos, dangan an mga tawong sadiri ni Cristo, sa pagdatong niya. Dangan maabot an katapusan asin dadaogon ni Cristo an gabos na kagsakop, sa gabos na awtoridad asin kapangyarihan na nasa kalangitan, asin itatao niya sa Dios na Ama an paghahade. Huli ta dapat na maghade si Cristo sagkod na an gabos niyang kaiwal ibugtak nin Dios sa irarom kan saiyang mga bitis. An huring kaiwal na dadaogon niya iyo an kagadanan. Kun an gabos na bagay nasasakopan ni Cristo, si Cristo mismo, na Aki, iyo man an mapasakop sa Dios na iyo an nagbugtak kan gabos na bagay sa irarom niya, tanganing sa Dios iyo an magin kagsakop kan gabos.

Tataramon kan Kagurangnan.

Gabos — **Salamat sa Dios.**

Pagrokyaw (*Tindog*)

(*Sinasambit kun dai inaawit an Alleluia*)

Alleluia! Maogma an nagmamana kan kahadean ni David, maogma an nadigdi sa ngaran nin Kagurangnan. Alleluia!

Evangelio

(Mateo 25, 14-30)

Ipinapahayag kan Evangelio an mensahe na an kabotan nin Dios para sa satuya iyo na gamiton niato an mga manlaen-laen na bendicion sa buhay para sa pagkamit kan Kahadean nin Dios.

P — ✠ Pagbasa kan Evangelio na Sinurat ni San Mateo.

B — **Kamurawayan saimo, Kagurangnan.**

“Pag-abot kan Aki nin Tawo sa saiyang kamurawayan, kaiba an gabos na angel, matukaw siya sa saiyang mamuraway na trono. An gabos na tawo sa dagâ titiponon sa atubang niya. Dangan lalaenon niya sinda sa duwang grupo, arog kan pastor na pinaglalaen an mga karnero sa mga kanding. Titiponon niya an mga karnero sa saiyang too asin an mga kanding sa saiyang wala. Dangan masabi an Hade sa mga tawo na nasa too

niya, ‘Madya kamo, mga paladan kan sakong Ama! Lumaog kamo sa Kahadean na inandam para sindo poon na lalangan an kinaban. Huli ta kan ako nagutom pinakakan nindo; kan ako napaha pinainom nindo; kan ako dayuhan pinadagos nindo; kan ako huba ginubingan nindo; kan ako naghelang inataman nindo; kan ako nabilanggo sinungko nindo.’ Dangan masimbag saiya an mga matanos, ‘Kagurangnan, kasuarin mi nahiling na nagutom ka asin pinakakan mi o napaha asin pinainom mi? Kasuarin mi nahiling na nakikihimanwâ ka asin pinadagos mi, o huba asin ginubingan mi? Kasuarin mi nahiling na naghelatang ka o nasa bilanggoan asin sinungko mi?’ Masimbag an Hade, ‘Sa katotoohan sinasabihan ko kamo, an anoman na ginibo nindo sa sarô kan pinakasadit kong mga tugang, ginibo nindo iyan sako!’ “Dangan masabi siya sa mga tawong nasa wala niya, ‘Humarayo kamo sako, mga minaldicion! Dumuman kamo sa daing katapusan na kalayo na inandam para sa Diablo asin sa saiyang mga angel! Huli ta nagutom ako alagad dai nindo pinakakan; napaha ako asin dai nindo pinainom. Dayuhan ako asin dai nindo pinadagos; ako huba alagad dai nindo ginubingan; naghelang saka nabilanggo alagad dai nindo ako sinungko.’ Dangan masimbag man sinda saiya, ‘Kagurangnan, kasuarin mi ika nahiling na nagutom o napaha, dayuhan o huba, naghelang o nabilanggo alagad dai mi ika pinaglingkodan?’ Masimbag an Hade sinda, ‘Sa katotoohan sinasabihan ko kamo, an dai nindo ginibo sa sarô kan mga pinakasadit na ini, dai man nindo ginibo sako.’ Kaya an mga ini isusubol sa daing katapusan na padusa, alagad an mga matanos maduman sa buhay na daing katapusan.”

P — Marahay na Baretâ kan Kagurangnan.

B — **Pag-omaw saimo Cristo.**

Homilia (*Tukaw*)

Pagrokyaw kan Pagtubod (*Tindog*)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bago kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saros a pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(*Sa mga minasunod na tataramon, abot sa asin nanitawo, an gabos minaduko.*)

Asin nani-laman huli kan Espiritu Santo ki Virgen Maria, asin nanitawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan

Aki, sabay na sinasamba asin pinapamuraway: siya nagtaram sa paagi nin mga profetas. Asin sa saro, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Nagsasarig na an kahadean kan Daio madatong na sa kinaban, mamibi kita na may mga pusong nagpapasalamat kaiba ni Cristo an Hade kan bilog na linalang.

S — **Kagurangan, hinanyoga an samong pamibi.**

1. Tanganing an mga namamayo kan Simbahan sa bilog na kinaban padagos na mag-otob kan saindang mga katongdan, orog na an pagigin tanda asin ilaw nin paglaom sa mga bihag kan kadikloman nin kasalan: mamibi kita sa Kagurangan. (**S**)
2. Tanganing an mga namamayo kan gobiernon magkaoroyon sa matanos asin makatawong paglutás kan mga problema sa sociedad: mamibi kita sa Kagurangan. (**S**)
3. Tanganing an mga nabibilanggo, mga dukha, mga nagmumundo asin mga pinapasakitang pakusogon sa saindang kaluyahan asin pasarigon sa saindang kawaràn nin paglaom: mamibi kita sa Kagurangan. (**S**)
4. Tanganing an mga naghehelang makamate kan nakakaomay na kapangyarihan ni Cristo huli kan pangataman kan saindang familia asin mga katood: mamibi kita sa Kagurangan. (**S**)
5. Tanganing an mga gadan niatong kadugo asin katood mag-ogma sa kapanoan kan langitnon na kamurawayan: mamibi kita sa Kagurangan. (**S**)

P — Langitnon na Ama, tabangi kaming magin marahay asin maboot sa samuyang kapwa tanganing, kun kami apodon na magtaong-kwenta kan samuyang buhay, kami magin kagaya-gaya saimo. Huli ki Cristo samong Kagurangan.

B — Amen.

LITURGIA NIN EUCARISTIA

Pagdolot (*Tukaw*)

(*Kun dai inaawit an Awit sa Pagdolot*)

P — Inoomaw ka, Kagurangan, Dios nin gabos na linalang, huli ta sa saimong pagkamatinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangan, Dios nin gabos na linalang, huli ta sa saimong pagkamatinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Dios sagkod pa man.**

P — (*Tindog*) Magpamibi kamo, mga tugang: tanganing an sako asin an saindong atang maako man lugod kan Dios amang makakamhan.

B — **Akoon man lugod kan Kagurangan an atang sa saimong mga kamot para sa kaomawan asin kamurawayan kan saiyang ngaran, para**

man sa pakinabang niato asin kan bilog niyang banal na Simbahan.

Pamibi sa mga Dolot

P — Kagurangan, kaming nagdodolot saimo kan sacrificio nin pakipag-olian nin tawo, mapakumbabang namimibi, na an Aki mo man sana magwaras sa gabos na nasyon kan mga dolot nin pagkasarô asin katoninongan. Siya nabubuhay asin naghahade sa kapanahonan kan mga panahon.

B — Amen.

Prefacio

Si Cristo, Hade kan gabos na nilalang

P — An Kagurangan mapa-saindo.

B — **Asin sa saimong Espiritu.**

P — litaas an mga pusô.

B — **Initaas mi na sa Kagurangan.**

P — Magpasalamat kita sa Kagurangan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen, magpasalamat kami saimo: Kagurangan, banal na Ama, Dios na makakamhan na daing kasagkoran:

Ta linahidan mo kan oleo nin kaogmahan an Bogtong mong Aki, samong Kagurangan Jesu Cristo, bilang danay na Padi asin Hade kan gabos na linalang, tanganing, nagdodolot kan saiyang sadiri sa altar kan Cruz bilang daing-digtâ asin matoninong na sacrificio, naotob niya an mga sacramento kan pagtubos sa katawohan, asin, kan sinakop an gabos na linalang sa kapangyarihan niya, pinaubaya niya sa saimong kadakulaan an danay asin lakop na kahadean: kahadean nin katotoohan asin buhay, kahadean nin kabanalan asin gracia, kahadean nin katanosan, pagkamoot asin katoninongan.

Kaya kaiba kan mga Angeles asin Arcangeles, kaiba kan mga Tronos asin Dominaciones, asin kaiba kan gabos na langitnon na hukbô, nag-aawit kami kan himno kan saimong kamurawayan, daing tapos na nagsasabi:

Gabos — Banal, Banal, Banal an Kagurangan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangan. Hosanna sa kaitaasan.

Pamibi sa Eucaristia (*Luhod*)

P — Misterio kan Pagtubod.

B — **An pagkagadan mo, Kagurangan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (*Tindog*)

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boot mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen

Pagpahayag kan Katoninongan

P — An katoninongan kan Kagurangan danay na mapa-saindo.

B — **Asin sa saimong espiritu.**

P — Magpatinaraohan kamo nin Katoninongan

Cordero

B — **Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: tawi kami nin katoninongan.**

Pag-alok sa Pagcomunyon (*Luhod*)

P — Uya an Cordero kan Dios, uya an nagpaparâ kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunyon (*S 28, 10-11*)

(*Sinasambit kun mayong Awit sa Comunyon*)

Matukaw an Kagurangan bilang Hade sagkod pa man; bebendicionan kan Kagurangan an saiyang banwaan sa katoninongan.

Pamibi Pakacomunion (*Tindog*)

P — Mamibi kita. (*Halipot na pagtoninong*)

Kagurangan, kaming nag-ako kan kakanon nin dai-pagkamagaganon, namimibi, tanganing nag-oogma sa pag-otob kan mga tugon ni Cristo, Hade kan gabos na linalang, kami mabuhay kaiba niya sa langitnon na kahadean sagkod pa man. Siya na bubuhay asin naghahade sa kapanahonan kan mga panahon.

B — Amen.

Oratio Imperata (Luhod)

Gabos — Dios na samong Ama, minadulok kami saimo sa samong pangangaipo. Hinahagad mi saimo an pagligtas samo tumang sa pandemia kan Corona Virus na naglalakop ngonian asin nagdadara nin kagadanan.

Minahagad kami kan saimong tabang para sa mga tawong naghingowa sa pag-adal kan hinalean, kan hiro, asin paglakop kaining pandemia. Giyahan mo an mga kamot asin isip kan mga experto sa salud tangani na sinda man makatabang nin may maninigong kakayahan asin pagmakulog sa mga may helang.

Ipinapamibi man niamo an mga naglilingkod sa banwaan, sa gobyerno asin pribadong agencia, tangani na makahanap sinda nin bulong sa helang na dara kaining pandemia. Ipinapamibi mi man an mga tinamaan na kan helang. Sinda man lugod maumayan tulos. Tawan mo kami ni biyaya na maghingowa para sa karahayan kan gabos asin sa mga nagsasakit.

Ini hinahagad mi huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios sa kapanahonan kan mga panahon. Amen.

Divino Rostro, kaheraki kami.

Nuestra Señora de Peñafrancia, ipamibi mo kami.

San Pedro Bautista, ipamibi mo kami.

(Angay man na hagadon an intercesion kan mga Patron kan parroquia, simbahan, capilla, o barangay.)

RITO SA PAGTATAPOS

Solemneng Bendicion

Pamibi para sa Banwaan

P — An Kagurangnan mapa-saindo.

B — Asin sa saimong espiritu.

P — Iduko an saindong mga payo asin maghagad nin bendicion sa mahal na Dios. (Halipot na pagtoninong)

Kagurangnan, bendicioni asin pakusoga an saimong banwaan, magdanay lugod sindang dayupot saimo asin danay na mag-ogma sa saimong pagkaherak. Huli ki Cristo na samong Kagurangnan.

B — Amen.

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.



GIYA SA PAGMISA SA SEMANA

Noviembre 23, Lunes

Ika-XXXIV na Semana kan Ordinariong Panahon, Verde
o Memorial ni San Clemente I, Papa asin Martir, Pula
o Memorial ni San Columbano, Abad, Puti

Misa — Ika-XXXIII na Semana kan Ordinariong Panahon
o Comun nin mga Martires: Para sa sarong Martir, o Comun nin mga

Pastor: Para sa Papa

o Comun nin mga Pastor: Para sa mga Misionero, o Comun nin mga

Santos: Para sa Abad

(Hilingon sa Misal Romano sa Bicol: Propio nin mga Santos asin

Santas, p. 268).

Mga Babasahon — Kap 14, 1-3. 4-5 | S 24. 1-2. 3-4. 5-6 | Lc 21, 1-4

Noviembre 24, Martes

San Andres Dung-Lac, Padi asin Pag-iriba, mga Martires, Pula

Misa — Hilingon sa Misal Romano sa Bicol: Propio nin mga Santos asin Santos, p. 269.

Mga Babasahon — Kap 14, 14-19 | S 96, 10. 11-12. 13 | Lc 21, 5-11

Noviembre 25, Miercoles

Ika-XXXIV na Semana kan Ordinariong Panahon, Verde
o Memorial ni Catalina nin Alexandria, Virgen asin Martir, Pula

Misa — Ika-XXXIV na Semana kan Ordinariong Panahon
o Comun nin mga Martires: Para sa Virgen na Martir, o Comun nin
mga Virgenes: Para sa sarong Virgen.

(Hilingon sa Misa Romano sa Bicol: Propio nin mga Santos asin Santos,
pp. 270).

Mga Babasahon — Kap 15, 1-4 | S 98, 1. 2-3. 7-8. 9 | Lc 21, 12-19

Noviembre 26, Jueves

Ika-XXXIV na Semana kan Ordinariong Panahon, Verde

Misa — Ika-XXXIV na Semana kan Ordinariong Panahon.

Mga Babasahon — Kap 18, 1-2. 21-23; 19, 1-3. 9 | S 100, 1-2. 3. 4. 5 | Lc 21, 20-28

Noviembre 27, Viernes

Ika-XXXIV na Semana kan Ordinariong Panahon, Verde
o Nuestra Señora de la Medalla Milagrosa, Puti

Misa — Ika-XXXIV na Semana kan Ordinariong Panahon

o Hilingon sa Misal Romano sa Bicol: Propio nin mga Santos asin
Santas, pp. 271-272.

Mga Babasahon — Kap 20, 1-4. 11-21, 2 | S 84, 3. 4. 5-6. 8 | Lc 21, 29-33

Noviembre 21, Sabado

Ika-XXXIV na Semana kan Ordinariong Panahon, Verde
o Memorial ni Santa Mariang Virgen kada-Sabado, Puti

Misa — Ika-XXXIV na Semana kan Ordinariong Panahon

o Comun ni Santa Mariang Virgen: Sa Ordinariong Panahon.

Mga Babasahon — Kap 22, 1-7 | S 95, 1-2. 3-5. 6-7 | Lc 21, 34-36



sambanwá

GIYA SA PAGESAMBA KAN BANWAAN NIN DIOS
Solemnidad kan Satong Kagurangnan Jesu Cristo, Hade nin Gabos na Nilalang

MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID,** Mga Editor

Hinimo asin inandam kan Archidiocesis kan Caceres, sa pangengenot kan
Caceres Commission on Communications, asin Commission on Liturgy.
Ciudad nin Naga, Pilipinas • 2020